

**“Maar Yeshua,
ek glo nie
in profete nie!”**

Deur Roy Sauzek

Verwysings:

Strong, James, S.T.D., LL.D., *Strong's Volledige Konkordansie van die Bybel*, Abingdon Press, Nashville, New York, 1974.

The American College Dictionary, Random House, New York, 1961.

Holy Bible, King James Version, Thomas Nelson Inc., Nashville, Tennessee, Kopiereg 1975.

Green, Jay P. The Interlinear Bible, Hebrew-Greek-English, Hendrickson publishers, Peabody, Massachusetts, 1986, Kopiereg 1985.

Afrikaanse Ou Vertaling van die Bybel.

Met toestemming van
Jay Green Jr., 1994

Onderstreping, bold gedruk en ander vorms van beklemtoning is deur die outeur self gedoen.

Gratis Boek – Nie te Koop

Hoofstuk een

Die Amp van 'n Profeet

'n Gemeente behoort te weet deur die **Woord van Elohim** of 'n persoon die amp van 'n profeet dra. Omdat die kerk in die wêreld onkundig was en grotendeels sonder die ampte van die vyfvoudige bedienings, het dit gefaai om lering te gee oor die amp van 'n profeet. Die hoof rede is waarskynlik dat daar maar min profete in die geskiedenis was. Nietemin was daar en is daar meer as wat die meeste mense dink. Dit is belangrik vir die mense van die wêreld en die kerk om sodanige amp te erken wat deur Elohim Homself ingestel is. Die rede hiervoor:

Mat 10:41 *Wie 'n profeet ontvang omdat hy 'n profeet is, sal die loon van 'n profeet ontvang; en wie 'n regverdige ontvang omdat hy 'n regverdige is, sal die loon van 'n regverdige ontvang.*

Yeshua het dit gesê met die oog op die toekoms, maar ewe belangrik is wat die Ou Testament (ons onderwyser) sê oor Elohim.

Amos 3:7 *Want YHWH doen niks tensy Hy sy raadsbesluit aan sy knegte, die profete, geopenbaar het nie.*

Yeshua het gewaarsku teen valse profete. Dit is een van die redes waarom dit belangrik is om 'n ware profeet uit te ken, sodat ons die valse kan herken.

Mark. 13:21-22 *En as iemand dán vir julle sê: Kyk, hier is die Messias! of: Kyk, daar! - moet dit nie glo nie. Want daar sal valse Christusse en valse profete ontstaan, en hulle sal tekens en wonders doen om, as dit moontlik was, ook die uitverkorenes te mislei.*

Ons kan dus sien dat hierdie valse profete die vermoë het om wonderwerke te doen en daardeur baie mense te mislei en te verlei. Een van die dinge wat hierdie valse profete sal sê is: "Kyk, hier is die Messias!" of: "Kyk, daar!" Roy het gesê in sy eie leeftyd het mense al voorgegee hulle is die Messias en ander wat sê: "Hy is hier!" of: "Daar is Hy!" Almal van hulle is valse profete.

Toe Yeshua aarde toe gekom het en wonderwerke gedoen het, het dié dinge nie, **op sigself**, openbaar wie Hy was nie. Bykans alles wat Yeshua op hierdie gebied gedoen het, het Elohim reeds vantevore deur profete gedoen. Yeshua se wonderwerke was slegs **vervulling van die Skrif** of van profesieë wat vooruit voorspel het wat Hy sou doen.

Elohim het **Sy Woord** vir ons gegee sodat ons Yeshua kon herken. Dit was as 'n getuienis van Sy Seun gegee. Dit was gegee sodat ons as gelowiges kon begryp dat Hy wettiglik (volgens die wette van Elohim) is wie Hy is.

Omdat beide Vader se profete én die vals profete kan **wonderwerke** doen, kan dit nie die onderskeidende faktor wees nie. Net soos dit met Yeshua was, moet die onderskeidende faktor die **Woord van Elohim** wees. Dit is presies wat Elohim aan Roy geopenbaar het toe hy Hom ontmoet het in 1980. Roy het nie in profete geglo nie, want hy is vertel hulle is dood saam met die apostels. Hier is die begin van sy verhaal met die gebeure daarin wat plaasgevind het aangaande hierdie onderwerp.

Dit was in 1980 met die week wat begin het op Palmsondag en geindig het op Paassondag. Hy het die heeltyd hierdie snaakse gevoel gehad dat dit 'tyd' is. Hy sê dat as hy nou terugkyk, dan was die gebeure nie binne sy beheer nie. Dit lyk asof dit aan die gang gesit was toe hy aan Yeshua gesê het dat hy alles sal doen wat Hy van hom vra, aangesien hy hierdie brandende begeerte gehad het om vir Hom 'n getuie te wees. (Sy idee om YHWH te dien was om maar net in die plaaslike gemeentekoor te sing.)

Hierdie sewe dae was gevul met visioene en nogmaals visioene. Nee, hy het nie vir Elohim gesien nie. Dit is nie wat "visioene van Elohim" beteken nie. Een aspek van 'n "visioen van Elohim" is dat dit SY visioen is vir die toekoms. Dit is een van die redes waarom Esegïël gesê het dat Hy "visioene van Elohim" gehad het. Dit was visioene aangaande die dinge van Elohim. Die week het met 'n droom geëindig (wat ongeveer 'n jaar later gemanifesteer het) en 'n ondervinding met Satan self. Jy mag dalk vra waarom Roy 'n ondervinding met Satan gehad het. Wel, ons sal jou vertel: Dit was as gevolg van wat Vader aan Roy geopenbaar het!

Mense het vir Roy gevra of hy weet wie hy was of wat Elohim besig was om met hom te doen. Hy het geantwoord dat hy nie omgee nie, want hy was net te bly dat Hy so 'n werklikheid vir hom was. Roy het intussen nuuskierig geraak oor die drome en bonatuurlike dinge wat net aanhou gebeur het met hom. Eindelik vra hy toe vir YHWH daaroor en Hy antwoord: *"Alhoewel jy 'n profeet is, maar jy het nie liefde nie, is jy niks."* Hy was geskok, want hy het nie geglo in hedendaagse profete nie, hoe kon hy 'n profeet wees? Hy het toe met Elohim gestry en gesê: "Dit is nie moontlik nie. Ek is nie waardig om so iets te wees nie." **Hy het niks geweet van hierdie "profeet ding" nie.** Toe antwoord YHWH: *"Jy is 'n profeet omdat Ek sê jy is een, of jy daarin wandel, of nie."*

Weke het verby gegaan waarin hy steeds met Vader gestry het oor sy eie onwaardigheid. YHWH het deurentyd Esegïël met hom behandel en oor die feit dat: "Esegïël net 'n mens was, een deur Elohim uitverkies." Toe op 'n dag, toe hy van 'n byeenkoms in Tulsa, Oklahoma, af terugkeer, het 'n vriend van hom 'n "woord" van Elohim af vir hom gebring. Hy onthou nie die presiese woorde nie, maar die boodskap was: *"Jy kruisig Yeshua opnuut deur jou plek of roeping as 'n profeet te ontken. Jy sê: 'Hy is nie wie Hy is nie' deur te sê jy is onbekwaam. As jy nie Sy beroep op jou aanvaar nie, het Hy vergeefs gesterf waar dit mense aangaan wie jy kon bereik het."*

Voordat Roy hierdie “woord” van sy vriend ontvang het, het hy gedink dat die vyand hom gebruik, want **hy kon net nie glo** dat hy ‘n profeet was nie. Toe besluit Roy op ‘n dag om die saak ernstig op te neem en sê: “Goed, Vader, as hierdie bediening van U af is en nie van die duiwel nie, bewys dan aan my dat ek ‘n profeet is. **Bewys dit aan my in U Woord.**” Hy het toe gedink: “Ha, ha! Nou het ek die duiwel aan sy strot beet – daar is geen manier dat dit in die Woord bewys kan word nie.” Dus was hy aan die wen, al was dit teen Vader! Toe vat Elohim hom na die boek van Numeri toe en skielik het dinge werklik ernstig begin raak.

Numeri 12:6,7,8a : *Toe sê Hy: Hoor tog my woorde. As julle profeet van YHWH is, sal Ek deur ‘n gesig My aan hom bekend maak, deur ‘n droom sal Ek met hom spreek. So is dit nie met my kneg Moses nie: in my hele huis is hy getrou. Mond tot mond spreek Ek met hom....*

Daar was dit toe reg voor Roy. Die **woorde was direk uit Elohim se mond**. Ook Yeshua het gesê:

Matt 4:4 *Daar is geskrywe: Die mens sal nie van brood alleen lewe nie, maar van elke woord wat deur die mond van Elohim uitgaan.*

Alles wat Roy in die Woord gelees het, het toe alreeds met hom gebeur. “**...sal Ek deur ‘n gesig My aan hom bekend maak**”. Die ondervindings wat hy gehad het, was nie uit homself of ‘n begeerte van homself nie. Dit was deur Elohim alleen en volgens Sy wil. Elohim het Homself aan Roy bekend gemaak in ‘n visioen. Hy het met hom gepraat deur drome. Roy het met Hom gesprek gevoer en Hy met Roy. Al hierdie dinge het gebeur deur YHWH se wil, nie syne nie! **Liewe, lewende Elohim! Roy** het dit nie daardie tyd besef nie, maar hy het ‘n geestelike wet uit Vader se eie mond aanskou. Dit sal nooit verander nie tot hemel en aarde verby gaan. Yeshua het gesê:

Matt 5:17,18 *Moenie dink dat Ek gekom het om die wet of die profete te ontbind nie. Ek het nie gekom om te ontbind nie, maar om te vervul. Want voorwaar Ek sê vir julle, voordat die hemel en die aarde verbygaan, sal nie een jota of een titteltjie van die wet ooit verbygaan totdat alles gebeur het nie.*

Die Wet en die profete het nie ophou bestaan by die kruis nie. Die woord “vervul” kan ook vertaal word met “volledig verkondig.” Yeshua het die wet tydens die Bergpredikasie volledig verkondig, waarvan hierdie Skrif deel uitmaak.

Apostels en profete het nie ophou bestaan toe die eerstes gesterf het nie. Geen man of profeet het ooit enigiets verander deur te sterf nie. Al die veranderinge of byvoegings tot Elohim se verbonde was gemaak deur mense wat geleef het. Nie een ding aangaande Elohim se woord was verander deur hulle dood nie.

Maar dinge het gebeur met Yeshua se dood. Toe Hy gesterf het, was 'n verbond bekragtig deur Sy bloed. Dinge het verander, selfs in die Hemel, deur Sy dood. Hy het gesê dat Hy die vyfvoudige-bediening in Sy gemeente sal vestig. Al vyf bedieninge sal daar wees wanneer die gemeente tot die eenheid in geloof kom.

Roy sê toe hy eenkeer na 'n profeet se lering in 'n kerk geluister het, het die profeet gesê hy weet niks van die “amp van 'n profeet” nie. Maar tog was hy op daardie oomblik besig om hulle te leer oor profete en die salwing! Daar is 'n verskil. Dit word alles openbaar in **Num. 11:13,14** waarheen Elohim vir Roy geneem het. Moses in gesprek met Elohim:

“Waarvandaan moet ek vleis kry om aan al hierdie volksgenote te gee? Want hulle ween by my en sê: Gee vir ons vleis dat ons kan eet. Ek alleen kan hierdie hele volk nie dra nie, want dit is vir my te swaar.”

Moses was besig om by Vader te kla oor die las van al die mense en hulle geweën by hom. Hy kon die las nie dra nie.

Num. 11:16,17 *Toe sê YHWH aan Moses: Bring vir my sewentig manne uit die oudstes van Israel bymekaar, van wie jy weet dat hulle oudstes van die volk en opsigters is en bring hulle by die tent van samekoms dat hulle daar by jou kan staan. Dan sal Ek neerdaal en daar met jou spreek en van die Gees wat op jou is sal Ek afsonder en op hulle lê; en hulle sal jou help om die las van die volk te dra, sodat jy dit nie alleen hoef te dra nie.*

Moses het by Vader gepleit en Hy het geantwoord. Let daarop dat Vader sê Hy sal van die Gees wat op Moses is afsonder en op die 70 sit. Dit was die gawe van profesie, soos wat later geopenbaar is. Vervolgens **Num. 11:25** *Daarop het YHWH neergedaal in die wolk en met Moses gespreek; en Hy het van die Gees wat op hom was, afgesonder en op die sewentig oudstes gelê. En terwyl die Gees op hulle rus, het hulle geprofeteer, maar daarna nie meer nie.* (NB: Die King James vertaling sê: “did not cease” i.p.v. “*maar daarna nie meer nie.*”)

Die gawe van profesie was verdeel deur YHWH onder die sewentig as ‘n **salwing om te profeteer**. Daar skuil meer in die verhaal hier. Dit is so lewensgetrou wanneer ons slegs in die vlees wandel.

Num.11:26-29 *Maar twee manne het in die laer agtergebly: die naam van die een was Eldad en die naam van die ander Medad; en die Gees het op hulle gerus - hulle het behoort by die wat opgeskrywe was, hoewel hulle nie na die tent (tabernakel) uitgegaan het nie - en hulle het in die laer geprofeteer.*

Stel jou voor die twee manne wat nie wou gaan nie. Sou jy gegaan het? Moenie probeer om vir Vader weg te kruip as jy uitverkies is nie. Dit gaan niks help nie. Daardie twee manne het toe in die laer geprofeteer – voor almal. Die mense het waarskynlik gedink hulle is van lotjie getik!

27 Toe hardloop 'n seun en vertel dit aan Moses en sê: Eldad en Medad profeteer in die laer. **28** En Josua, die seun van Nun, die dienaar van Moses van sy jeug af, antwoord en sê: My heer Moses, belet hulle dit!

Kan jy sien hoe gebeur dieselfde ding vandag? Mense wat dink profeteer is onbybels, rapporteer dit gewoonlik baie gou aan die betrokke owerheid (die predikant, ens.).

29 Maar Moses sê vir hom: “Bekommer jy jou om my onthalwe? Ag, as die hele volk van YHWH maar profete was, dat Vader sy Gees oor hulle mag gee!”

Moses het eenvoudig hulle wat geprofeteer het profete genoem en hy het gewens die hele Israel kon profeteer. Paulus het dieselfde ding in die Gemeente gesê.

1 Kor. 14:5 Ek wens dat julle almal in tale praat, maar nog liever dat julle profeteer. Want hy wat profeteer, doen beter as hy wat in tale praat, tensy hy dit uitlê, sodat die gemeente geestelik opgebou kan word.

Iets anders was egter op die punt om te gebeur in Moses se verhaal oor profete en die bediening van 'n profeet. Dit gebeur ook vandag weens mense se gebrek aan kennis.

Núm. 12:1 En Mirjam en Aäron het teen Moses gesprek vanweë die Kusitiese vrou wat hy geneem het; want hy het 'n Kusitiese vrou geneem.

Twee mense, 'n man en 'n vrou, het te staan gekom teen Moses die profeet.

Núm 12:2 En hulle het gesê: Het YHWH dan maar alleen met Moses gesprek? Het Hy nie ook met ons gesprek nie? En YHWH het dit gehoor.

Hier het ons twee mense wat gedink het hulle is soos Moses omdat hulle geprofeteer het! Elohim het egter baie gou en baie duidelik die verskil aangetoon tussen 'n profeet (iemand oor wie 'n salwing kom) en die ‘**amp**’ van profeet (iemand gesalf as 'n persoon met 'n spesifieke taak in sy lewe).

Núm. 12:5 En YHWH het in 'n wolkkolom neergedaal en by die ingang van die tent (tabernakel) gaan staan. Daarna het Hy Aäron en Mirjam geroep en albei het nader gekom.

Dit was vir Elohim belangrik genoeg om in te tree en hierdie situasie persoonlik uit te klaar.

Núm. 12:6-8 *Toe sê Hy: Hoor tog my woorde: As daar 'n profeet van YHWH onder julle is, sal Ek deur visioene My aan hom bekend maak en deur drome met hom praat. Maar met my dienaar Moses is dit anders; hy is die getrouste in my hele huis. Met hom praat ek van aangesig tot aangesig, nie deur verborge woorde nie...*

In die vorige skrifgedeeltes (Num 12:6-8) verskaf Elohim 'n paar beginsels sodat ons kan weet wanneer Hy 'n profeet aangestel het:

- 1) Neem kennis dat dit Elohim se aanstelling is en dat dit niks met die persoon te doen het nie;
- 2) Vader YHWH sal Homself in 'n visioen aan die persoon openbaar; *...sal Ek deur visioene My aan hom bekend maak...*
- 3) Elohim sê Hy sal deur drome met hom praat *...en deur drome met hom praat...*

Verder praat Vader van die getroue profete soos Moses met wie Hy van aangesig tot aangesig sal gesprek voer. ***Met My dienaar Moses is dit anders; hy is die getrouste in my hele huis. Met hom praat ek van aangesig tot aangesig, nie deur verborge woorde nie...*** Nie net sal Hy gesprek voer met hulle nie, maar Hy sal so praat dat alles verstaan word en niks verborge is nie. Al hierdie dinge was ver weg van die twee wat gedink het hulle was soos Moses! Omdat Elohim kwaad geword het oor die situasie het Mirjam melaats geword. Aäron het besef dat hulle gesondig het en het Moses gevra om vir hulle in te tree, wat hy ook toe gedoen het. Gevolglik is Mirjam vergewe en was sy slegs vir 'n week melaats, maar sy het nogtans gely onder die gevolge van haar dade.

Uit die voorafgaande sien ons **dat Vader baie belangrike beginsels het oor profete**. Elohim stel profete aan en ons kan sien waarom Hy kwaad word vir enige iemand wat **self besluit om die amp van profeet te beklee, net oor hulle geprofeteer het**. Vader se profete is na aan Sy hart, maar dit vrywaar hulle nie van wat met hulle gebeur as gevolg van hul doel nie.

Om meer te weet van Vader se voortdurende 'werkinge' in 'n profeet se lewe, kyk ons na die boek van Jeremia. Hier praat Elohim spesifiek van profete.

Jeremia 23:18 *Want wie het in die raad van YHWH gestaan, dat hy sy woord sou sien en hoor? Wie het sy woord beluister en gehoor?*

As 'n persoon in die raad van Elohim gestaan het, sal hy in staat wees om daaroor te praat. Roy het op 'n dag met Yeshua geredeneer oor 'n saak. Yeshua het self die argument beëindig deur te sê: **“Dit is soos dit is!”** Nodeloos om te sê Roy het die argument verloor...

Toe Roy na die 'Nuwe Hemel en die Nuwe Aarde', (Elohim se visioen van die toekomst vir die mens) gestaan en kyk het, het YHWH vir hom gesê: **“Daar SAL 'n Nuwe Hemel en 'n Nuwe Aarde wees.”**

Hy sê hy het dieselfde stem gehoor wat Moses gehoor het: Vader s'n. **Hy was oortuig daarvan, want al die krag en die hele wese van die heelal was in daardie stem.** Dit was volgens hom onbeskryflik. Daar is drie hoof stemme in die heelal: Vader s'n, Yeshua s'n en die Heilige Gees s'n. Min het Vader se stem gehoor en min het Yeshua s'n gehoor. Maar belangriker as al die gesprekke of ontmoetings wat profete met Elohim gehad het, is die vraag: 'Kan die profeet begrip verskaf van wat Elohim openbaar het?'

Jer. 23:22 *Maar as hulle in my raad gestaan het, moet hulle My volk My woorde laat hoor en hulle terugbring van hul verkeerde weg en van die boosheid van hulle dade.'*

Hoe dit ook al sy, alles wat Elohim op aarde doen, is vir die mense van die aarde weens sy liefde vir hulle. Wanneer hy 'n profeet stuur, is dit vir die mense se beswil. Jy kan nogtans 'n profeet hê wat Elohim gehoor het, maar wat prematuur optree. 'n Goeie profeet ploeg nie net die onkruid om nie, maar herplant met goeie saad. 'n Profeet wie se doel dit is om te korrigeer, behoort jou nie net te kan vertel wat verkeerd is nie, maar ook wat die oplossing vir die probleem is. Die profete wat gestuur was na die konings van die Ou Testament het presies dit gedoen. Hulle was manne wat gesit het in die Raad van Elohim en wat die weë van Elohim geken het.

'n Gestuurde

Iemand met die amp van profeet is 'n 'gestuurde'.

Jer. 23:21 *Ek het die profete nie gestuur nie, tog het hulle geloop; Ek het nie met hulle gespreek nie, tog het hulle geprofeteer.*

Hier het Elohim gepraat van valse profete, dus kan jy sien dat ware profete deur Hom gestuur word. 'n Ware profeet word gestuur met 'n doel, of het een of ander opdrag. As jy deur Elohim gestuur is kan jy mense vertel wat Hy gesê het toe Hy jou gestuur het. Dit is nie iets wat sommer opgetower is uit jou eie gees nie. Jona het ons hiervan vertel.

Jona 1:1,2 *En die woord van YHWH het gekom tot Jona, die seun van Amittai en gesê: Maak jou klaar, gaan heen na die groot stad Ninevê en spreek hom aan, want hulle boosheid het aan My bekend geraak.*

Hierdie was nie die eerste keer ooit wat Vader met Jona gepraat of gewerk het nie. Ons glo hierdie is die regte oomblik om verder die bewyse te ondersoek oor wat gesê is oor 'n profeet wat sit in die Raad van YHWH. Na opleiding en reiniging deur Elohim self, ken hulle (die profete) Sy weë.

Die eerste teken hiervan in Jona se lewe is sigbaar in sy gebed wat hy gebed het terwyl hy in die maag van die vis was:

Jona 2:3 *Want U het my in die see gewerp, in die hart van die see, sodat die watermassa my omring het; al U branders en U golwe het oor my heengegaan.*

Het Jona Elohim geken? Meeste mense sou die duiwel die krediet gegee het vir wat hier gebeur het.

Jona 2:7: *Toe my siel in my versmag het, het ek aan Elohim gedink; en my gebed het tot by U in U heilige tempel gekom.*

In die vis se maag peins Jona oor sy eie siel, sy eie gedagtes. Hy praat met Elohim daaroor. **Toe my siel in my versmag het, het ek aan Elohim gedink...** Sy siel het nie versmag voordat hy in hierdie krisis beland het nie. Sy vlees het tevore sy siel oorheers. Toe sy vlees misluk deur wat gebeur het, kry hy sy gedagtes agtermekaar. Jona onthou nie net elke ontmoeting en alles wat Vader hom geleer het nie, maar ook wat Vader hom aangesê het om te doen. Kyk na die volgende sin.

Jona 2:8: *Die wat nuttelose afgode vereer, verlaat die Een wat hulle genadig is.*

Jona het van homself gepraat en van die mense van Ninevè. Was hierdie kennis van begrip wat Jona ontvang het net iets wat in hom opgeduik het? Klaarblyklik nie! Jona het hierdie beginsel geken en verstaan, omdat dit gekom het van **sy eie siel, sy innerlike mens**. Want van waar anders sou jy gepraat het as jy jou bevind het in die maag van 'n vis, wetende Elohim het jou daar laat beland? Daar is nog meer bewys in die Skrif dat Jona Elohim ervaar en met Hom gepraat het vóórdat hy aangesê was om na Ninevè te gaan.

Vers nege van dieselfde gebed. **Wat ek beloof het, sal ek betaal...** Hierdie belofte was gemaak vóórdat Elohim hom na Ninevè gestuur het. In Roy se eie gesprek met Yeshua het hy 'n gelofte aan Hom gedoen. Hy het gesê: "Yeshua, Ek sal enigiets doen wat U wil hê ek moet doen, as u **my sal wys** wat U wil hê, solank U my gesin die nodige begrip daarvoor sal gee." Toe, in 'n visioen wys Hy vir Roy waar hy in 'n kerk lering gee. Roy het gesê: "Yeshua het julle lief," saam met ander dinge. Hy het Sy deel van Roy se ooreenkoms of gelofte gehou deur hom visueel te wys.

Net soos Jona het Roy hierdie gelofte gedoen voordat Elohim hom die opdrag gegee het. Uit Jona se belofte sien ons dat hy 'n gesprek met Elohim gehad het, dus was die reëls (geestelike wette) nagekom wat uit Vader se mond gegee was vir Mirjam en Aaron se kennisname. Nadat Jona uit die vis uit was, het Elohim hom wéér aangesê om na Ninevè te gaan. Hy het gegaan. Jona het Elohim se Woord aan hulle oorgedra.

Die mense het hulle van hul verkeerde weë bekeer en Vader het Hom weerhou van wat Hy sou gedoen het. Jona was ontevrede en kwaad, daarom het hy weer tot Vader gebid. In hierdie gebed kan ons sien dat hy Elohim ken.

Jona 4:2 ...want ek het geweet dat U 'n genadige en barmhartige Elohim is, lankmoedig en groot van goedertierenheid, Een wat berou het oor die onheil.

Jona het geweet dat Elohim genadig was, barmhartig, stadig om kwaad te word en vriendelik. Daarom het hy in die eerste plek die vermetelheid gehad om in ongehoorsaamheid te vlug. Jona het die Woord **weet** gebruik. Hy het nie gesê hy glo nie. Daar is 'n groot verskil. Roy sê **hy weet Elohim het mense lief**, nie net omdat die Bybel so sê nie, maar omdat hy die Nuwe Hemel en die Nuwe Aarde gesien het, die manifestasie van Sy liefde vir die mens. Hy het Sy liefde **gesien** toe hy in die ewigheid (ewige lewe) ingekyk het. Hy het aanskou wat Elohim vir hulle wat oorwin in stoor het. **Om te weet is baie verskillend van om te glo.**

Mense wat die amp van profeet het, ken Yeshua, want Hy hou raadsvergadering met hulle. Mense wat profeteer deur salwing ken nie vir Yeshua op dieselfde manier nie – soos gedemonstreer in die geval van Moses teenoor Aaron en Mirjam. Die sewentig wat gesalf was met 'n deel van die gees van profesie van Moses, het Vader nie naastenby geken soos Moses het nie. Moses kon jou ook vertel van die oomblik toe hy deur Elohim aangestel was. Elohim het met hom gepraat uit die brandende bos:

Eksodus. 3:10,11 *Gaan dan nou heen, dat Ek jou na Farao kan stuur; en lei my volk, die kinders van Israel, uit Egipte uit.* Maar Moses het tot Elohim gespreek: *Wie is ek, dat ek na Farao sou gaan en dat ek die kinders van Israel uit Egipte sou lei?*

Moses is in gesprek met Elohim. In hierdie deel van die verhaal kan ons sien dat die geestelike wet uit Elohim se mond vervul word met Moses – **voordat dit mondelings** aan Moses, Aaron en Mirjam gegee was in Num.12. Elohim het Homself aan Moses geopenbaar in 'n visioen en aangesig tot aangesig met hom gepraat.

Hoe kan ons 'n profeet herken of 'n profeet ontvang in Sy naam? Ons moet uit die **persoon se getuienis** die volgende beginsels herken wat Elohim neergelê het:

- 1) Hulle ondervinding **sal deur Elohim self geïnisieer word.**
- 2) Elohim sal **homself deur 'n visioen openbaar.**
- 3) Elohim sal **deur 'n droom, of direk met hulle praat.** Die Wet is die skaduwee van dinge wat kom. Die persoon se lewe behoort 'n skaduwee te werp van hierdie dinge daarin.

- 4) 'n Profeet van Elohim sal altyd probeer om mense by Elohim uit te bring (beking van verkeerde weë) en nie om hulle oor te laat aan die plesier van hul eie lewens nie. Hulle sal nie alleenlik sê dat “YHWH is” nie, maar ook dat “Yeshua is.”
- 5) Hy/sy sal altyd **die aandag op Elohim of wat Hy doen, vestig** en hiermee vervul wat staan by:

Amos. 3:7 *Want YHWH, die Almagtige, doen niks tensy Hy sy raadsbesluit aan sy knegte, die profete, geopenbaar het nie.*

- 6) Hulle sal 'n **opdrag van Elohim hê**, of dit groot is of klein.
- 7) 'n Profeet sal praat oor of van iets wat hy gesien het. Dit sal nie sy verbeelding wees nie, maar iets op 'n gegewe oomblik **willekeurig deur die Heilige Gees gegee**.
- 8) Die hoof funksie van die amp van profeet is vir korreksie. Selfs Moses was gestuur om die situasie tussen Israel en Egipte te “korrigeer.” Sien ook **Jer. 23:22** “...moet hulle my volk my woorde laat hoor en hulle terugbring van hul verkeerde weg en van die boosheid van hul handeling.”

'n Mens moet besef dat *die dinge* wat in 'n profeet se lewe gebeur, deurdrenk is met Elohim. Hierdie ‘dinge’ is heeltyd besig om te trek aan die profeet en hom voor te berei sodat hy sy besondere opdrag of doel kan vervul. Jy kan ‘**n valse profeet**’ herken deur sy woord te vergelyk met Vader se Woord. 'n Ware profeet moet die patroon vervul wat Elohim gevestig het, vanuit Elohim se eie mond. Hy sal jou nie in onkunde hou nie!

Hoofstuk Twee

Oordeel, een funksie van 'n profeet.

Die enigste rede waarom Roy geskryf het oor die onderwerp van oordeel, is omdat Elohim direk met hom daarvoor gepraat het. Hierdie is 'n saak wat 'n baie groot probleem onder gelowiges is, omdat hulle bang is om iets negatiefs oor of aan iemand te sê, ingeval hulle dalk sou oordeel. Dit is 'n moeilike onderwerp om te begryp, veral in die verstaan van Vader se Woord en die ampte in die gemeente. Profete moet, ook wat oordeel betref, hulle funksie in die amp van profeet verstaan: Dat dit Vader se oordeel is wat deur hulle uitgespreek moet word en nie hul eie nie! Soos wat jy oor die Bybelse profete lees, sien jy hulle was nie blind of onkundig oor hulle situasies nie. Hulle was ten volle bewus daarvan danksy Vader se raadgewing. Derhalwe kon hulle Vader se oordeel uitspreek en nie hul eie nie.

Jer. 23:18 *Want wie het in die raad van YHWH gestaan, dat hy sy Woord sou sien en hoor? Wie het na sy Woord geluister en dit gehoor?*

Hierdie Skrifte oor Elohim se raadgewing van profete openbaar dat daar veel meer aan die funksie van 'n profeet is as om slegs blindweg te doen en te sê wat Elohim beveel. In hierdie hoofstuk van Jeremia het Elohim onderskeid gemaak tussen valse profete en ware profete.

Jer. 23:22 *Maar as hulle in my raad gestaan het, moet hulle my volk My woorde laat hoor en hulle terugbring van hul verkeerde weg en van die boosheid van hul handeling.*

Weer eens praat Elohim van in sy raad staan, wat die sleutelvereiste is om gesonde oordele te doen en suksesvol te wees. Hoe langer jy as 'n profeet in Elohim se raad staan, hoe meer sal jy leer van Elohim se weë en gedagtes. Dan sal jy beter in staat wees om oordele te vorm – gebaseer op Elohim se wil en nie die mens se wil nie. Ja, ons is veronderstel om te oordeel. Yeshua het gesê:

Joh. 7:24 *Moenie oordeel volgens wat julle sien nie, maar oordeel 'n regverdige oordeel.*

Mat. 7:1-2 *Moenie oordeel nie, sodat julle nie geoordeel word nie. Want met die oordeel waarmee julle oordeel, sal julle geoordeel word; en met die maat waarmee julle meet, sal weer vir julle gemeet word.*

Dit mag verwarrend klink, want op een plek sê Yeshua: 'Moenie oordeel nie...' maar op 'n ander plek: '...maar oordeel 'n regverdige oordeel.' Weer eens moet ons sommige fundamentele gedagtes neerlê.

Jer 9:23,24 So sê YHWH: *Laat die wyse hom nie beroem op sy wysheid nie, en laat die sterke hom nie beroem op sy sterkte nie, laat die ryke hom nie beroem op sy rykdom nie; maar laat hy wat wil roem, hom hierop beroem dat hy verstaan en My ken, dat Ek YHWH is wat goedertierenheid, reg (oordeel) en geregtigheid op die aarde doen; want in dié dinge het Ek 'n behae, spreek YHWH.*

Elohim sê dat **elkeen wat werklik verstaan**, weet: “Dat dit Hy is wat minsaamheid, oordeel en geregtigheid op die aarde beoefen.” Ons as Christene is veronderstel om dieselfde te doen, maar ons moet onthou dit is Elohim en alleenlik Hy wat waardig is om dit volmaak te doen. **Dit is Vader wie ware minsaamheid oor 'n situasie openbaar.** Dit is Elohim wie die waarheid openbaar en Hy is die perfekte en ware regter in 'n situasie. Toe YHWH aan Roy gesê het dat hy 'n profeet is, maar dat hy sonder liefde niks is nie, het Roy gedink dat hy geslaag het, want hy was lief vir mense. Geen probleem dus! Maar toe sê Hy: *“As jy hulle liefhet sal jy hulle die waarheid vertel.”* Die mens se liefde sê: “Laat hulle glo wat hulle wil.” Elohim se liefde sluit die waarheid in oor die gevolge van dit wat die mens glo. Elohim het die ware konsep van liefde.

Ons moet begin besef dat Yeshua nie aarde toe gekom het om te oordeel nie, maar om die werke van die duiwel te vernietig en om 'n verbond te vestig waardeur mense gered kan word tot die ewige lewe. Hy het gesê:

Joh. 12:46-47 *Ek het as 'n lig in die wêreld gekom, sodat elkeen wat in My glo, nie in die duisternis sou bly nie. En as iemand na my woorde luister en nie glo nie, Ek oordeel hom nie; want Ek het nie gekom om die wêreld te oordeel nie, maar om die wêreld te red.*

Ons moet ook besef dat Vader die finale regter is. In beide die Ou en Nuwe Testamente het Hy barmhartigheid, reg (oordeel) en geregtigheid op die aarde laat geskied. **Hy doen dit steeds en het altyd, selfs toe Yeshua op aarde was.**

Ons moet Elohim se posisie besef: Dat dit **Hy is wat minsaamheid, oordeel (reg) en geregtigheid op die aarde beoefen...** Elohim doen dit in die gemeente want Hy het ons lief. Met hierdie gedagtes as 'n fondasie, kan ons begryp waarom Elohim die gebeure in Roy se lewe toegelaat het en waarom Hy sekere dinge gesê het.

Die gebeurtenis: Sonder om doekies om te draai, het Vader vir Roy deur 'n visioen gewys dat sy vrou nie gered was nie. Die kerk wat hulle bygewoon het, sou gesê het sy was gered. Selfs al het hy nie alles verstaan wat Vader hom gewys het nie, was hy bekommerd dat ander in sy kerk verkeerdelik van dieselfde opinie was oor hulleself – dat hulle gered was. Hulle was tog aan dieselfde lering blootgestel. Hy het hulle saam met wie hy grootgeword het liefgehad en Roy vriend was bekommerd oor hulle redding.

Dit was immers 'n skok om uit te vind dat wat hy in sy gees omtrent sy vrou gevoel het, korrek was. Hy het besef dat dit Vader was wat daardie kommer daar gesit het.

Die gebeurtenis het begin tydens 'n komitee-vergadering waarvan die doel was om 'n nuwe pastoor vir die gemeente te kies of voor te stel. Roy en 'n paar ander in die gemeente wou verseker dat hulle 'n pastoor kry wat werklik in die Bybel glo. Roy kan nie die presiese woorde onthou nie, maar iets is gesê wat hom genoep het om te sê dat daar moontlik ongeredde mense in hulle gemeente was. Hy was onmiddellik beskuldig dat hy oordeel! Menende dat hulle reg was, het hy doodstil laer af in sy stoel gesak en Yeshua gevra om hom te vergewe omdat hy geoordeel het. Soos jy kan raai, was hy die res van die vergadering baie stil.

Die volgende oggend was Roy besig met los werkies terwyl hy met Yeshua gesels het. Hy was opreg besorg oor die **uitslag van die vergadering** en of hulle die regte pastoor sou kry. Hy het reeds die feit aanvaar dat hy ander mense geoordeel het, maar daar was steeds 'n ongemaklikheid in hom oor daardie vergadering. **(Hier volg 'n voorbeeld van "om te staan in die 'raad' van Elohim.")**

Roy het skielik gestop, stilgestaan en Vader gevra oor die vergadering. Hy wou weet of daar iets gesê was wat nie gesê moes gewees het nie en of daar iets nie gesê was nie wat wel gesê moes gewees het. Hier is Vader se antwoord:

"As 'n man deur die Gees van Elohim 'n woord van kennis en 'n woord van wysheid ontvang, en dit blyk dat daar 'n probleem is met iemand (soos dit met sy vrou was), is dit die oordeel van die man of die oordeel van YHWH?"

YHWH was besig om met Roy te deel oor Esegiël, daarom was sy gedagtes soos volg: "Toe Esegiël oordele oor die mense uitgespreek het, was dit nie sy oordele nie, maar YHWH se oordele deur hom." Roy kon dit verstaan. Vader het sy gedagtes geken. Toe het YHWH verder gesê:

"As genoemde man begin om dieselfde probleem te sien in hulle (die gemeente) rondom hom, is dit sy oordeel of My oordeel?"

Die antwoord was duidelik: "Yeshua se oordeel." Roy het toe 'n bietjie later gevra: "Wat is oordeel dan?" YHWH antwoord toe:

"As 'n regter op die regbank nie al die bewyse het nie en hy maak 'n uitspraak, het hy 'geoordeel'. As 'n regter op die regbank al die bewyse het en 'n uitspraak maak, het hy 'n gesonde besluit geneem en nie geoordeel nie."

As jy die bewyse het, oordeel jy nie, maar jy neem gesonde besluite. Kyk wat het Yeshua hieroor gesê:

Mat. 7:2 *Want met die oordeel waarmee julle oordeel, sal julle geoordeel word; en met die maat waarmee julle meet, sal weer vir julle gemeet word.*

Hierdie Skrif waarsku ons om gesonde besluite (oordele) te neem, sodat dit met jou ook so gedoen sal word. As jy meet met Elohim se Gees, sal jy ook daarmee gemeet word. Dan sal Elohim aan jou meer sake van die Gees openbaar sodat jy nog meer gesonde besluite kan neem. Met die oordeel wat ons oordeel, sal ons geoordeel word. Daarom is dit noodsaaklik dat ons regverdig oordeel sodat ons ook regverdig geoordeel sal word. **Om al die bewyse te kan hê**, benodig ons Elohim se insette. Wanneer ons Elohim se bewyse het, oordeel ons nie, maar ons neem gesonde besluite, gebaseer op Elohim se oordeel. Want sodra Elohim iets vir 'n profeet wys is dit Elohim se oordeel, nie die profeet s'n nie.

YHWH is die 'Hoofregter'. **Hy weet alles**, selfs die gedagtes of bedoeling van die hart. Hy is die openbaarder van die waarheid, nie mense of profete nie. As ons dus roem, laat ons roem in Hom en in die feite van wat Hyself gesê het by:

Jer. 9:23-24 *...dat Ek YHWH is wat goedertierenheid, reg (oordeel) en geregtigheid op die aarde doen; want in dié dinge het Ek 'n behae, spreek YHWH.*

Toe het Roy verstaan dat hy in die komiteevergadering die **situasie** geoordeel het, nie die mense nie. Vader het vir hom meer bewyse gegee - Sy bewyse - en dus Sy oordeel van die situasie. Roy het nie geoordeel toe hy opgemerk het daar kan ander wees in dieselfde posisie as sy vrou nie, want die bewyse was reeds daar. Eintlik was hulle wat hom beskuldig het besig om self te oordeel op grond van hoe dinge voorgekom het en nie volgens enige wettige bewyse nie. Elohim is besig om Sy gemeente te reinig van vals leringe en sy mense van boosheid. Roy het gesê dat sedert hy as profeet begin funksioneer het (dit behels 'n funksie), wys Elohim hom soms dinge oor mense en situasies. Hier is 'n eenvoudige voorbeeld:

Vader skilder 'n toneel deur middel van 'n visioen of 'n droom. In hierdie toneel word algemene dinge belig. Dit kan so eenvoudig wees soos 'gevoelens'. Later kom Roy die persoon of die situasie tee wat in die toneel geskilder was. Dan, gewoonlik, maar nie altyd nie, **bevestig** Roy se ontmoeting met daardie persoon of situasie dit wat deur Elohim geskilder was. Die punt is dat sou hy die persoon of situasie teëgekome het sonder die toneel wat Elohim geskilder het, sou hy waarskynlik nie die ware probleem opgemerk het nie. Dan sou hy verseker nie **reg** geoordeel het nie! Maar met Vader wat die toneel skilder, word dit Sy oordeel, nie Roy s'n nie. En deur die bevestiging in die fisiese, vat dit werklik alle oordeel van die profeet af weg.

Roy sê hy was al in situasies waar mense gedink het hy het iets wat Elohim openbaar het verkeerd vertolk. Maar die waarheid is: Hy was gewys, dit het gemanifesteer en dan het hy openbaar wat dit was.

In hierdie spesifieke situasie van die komitee-vergadering hierbo, was daar absoluut geen vraag in sy gemoed nie, omdat die bewyse alreeds gemanifesteer het in die natuurlike wêreld.

Toe Jona Ninevè toe is, het Vader hom reeds ingelig gehad oor wat hy moes sê en wat sou gebeur. Jy moet besef wat Jona verstaan en gesien het. Ongeregtigheid het reeds voor hom in die natuurlike wêreld gemanifesteer. Elohim wou die mense 'n kans gee om berou te hê en genade te ontvang. Die mense van Ninevè kon die profeet se woorde verwerp of aanvaar. Maar hulle moes eers die woord van Elohim hoor – Elohim se aangekondigde oordeel (d.m.v. Jona) – **om die beskikbare genade te kon ontvang**.

Dit is belangrik om te weet dat die funksies van die amp van profeet nie verander het oor ons in Nuwe Testamentiese tyd is nie! Daar is en sal wees, profete met 'n missie om oordeel uit te oefen soos deur Elohim bepaal vir sekere situasies. Dit is goed. Oordeel is belangrik **sodat genade kan kom**. Elohim het Roy ingelig dat sou hy nie sy instruksies oor oordeel na mense toe herlei nie, **genade nie na die mense toe sal kan kom nie**. Hulle sal voortgaan om **onwaarheid of sonde** te beoefen, soms wetend en soms onwetend.

In ons hofsisteem moet daar 'n oordeel of bevinding wees voordat 'n vonnis gevel kan word. Sonder 'n veroordeling word die beskuldigde opgesluit, geestelik en soms ook fisies. Uiteindelik breek die hofdatum aan en vonnis word uitgespreek. Hy kan onskuldig bevind word. Indien hy skuldig bevind word, kan hy begenadig word of nie, afhangende van die spesifieke geval. **Nietemin kan niks hiervan gebeur voordat oordeel nie plaasgevind het nie**.

In die aardse dimensie veroorsaak sonde die dood in situasies, verhoudings, lewens en soms die vlees. Elohim openbaar dikwels die waarheid deur die Heilige Gees of 'n profeet, deur openlike oordeel. Dan, na gelang van die reaksie van die persoon of persone, kom genade, of die vrug van sonde word voltooi. Die mense van Ninevè was alreeds gevonnissen en op pad om die vrugte van hulle ongeregtigheid te pluk. Maar toe het Vader vir Jona gestuur om hulle oor die vonnis te waarsku (openbaring van wat sou gebeur). Hulle het hul egter bekeer en genade ontvang!

Elohim, wat die Regter is, bepaal **wanneer die verhoor sal plaasvind**. Hy bepaal ook **wanneer vonnis uitgespreek sal word** en **wat daardie vonnis is**. Die tydsberekening hiervan is alles Elohim se besluit. Die Bybel sê daar kom 'n 'Groot Oordeel'. Dit sal gebeur op die tydstip wat Elohim bepaal het. Punt. Maar dit gaan gebeur! Niemand kan dit keer of enige seggenskap hê oor wat gaan gebeur of watter vonnis uitgespreek sal word nie. Ons sal almal geoordeel word deur die rekords wat gehou word by die Berg Sion. Alles sal wetlik gedoen word.

Ons is nou by die tyd van die reiniging van die Bruid van Yeshua. Ons moenie die **funksie van 'n profeet** op die gebied van 'oordeel' verwerp nie, want Vader gee steeds oordele deur profete. **Ons het werklik oordele in ons lewens nodig sodat genade kan kom**.

Wat mense dikwels nie besef nie, is dat genade betrokke is by genesing en verlossing. As ons nooit erken dat ons 'n probleem het nie, kan dit nooit aangespreek en reggestel word nie. Elohim stuur soms 'n profeet om waarheid te openbaar wat ons nooit sou erken nie, of waarvan ons onbewus was. Ons het dan die geleentheid om die genade te ontvang wat ons nodig het.

In ons natuurlike lewe vorm ons oordele (besluite). Juis nou reeds oordeel (besluit) jy oor wat in hierdie boek geskryf is. Ons moet kan oordeel. Die belangrike is egter **waarop ons ons oordele baseer**. Hoeveel bewyse het ons werklik? Soveel kere oordeel ons volgens die uiterlike, sonder die waarheid soos openbaar deur Elohim se Gees. Yeshua het hiervan gepraat by:

Joh. 7:24 *Moenie oordeel volgens wat julle sien nie, maar oordeel 'n regverdige oordeel.*

Ons moet besef dat 'n regverdige oordeel alleenlik kan plaasvind wanneer Elohim alleen – nie mense nie – die waarheid oor die gegewe situasie openbaar het, of wanneer ons **al die inligting** aangaande 'n situasie het. Sonder die Gees van Elohim kan ons eintlik niemand oordeel nie, want ons weet nie wat in die betrokkenes se lewens gebeur het om sekere gedrag by hulle te veroorsaak nie. Dit is oordeel op die uiterlike, presies wat Yeshua gesê het ons nie mag doen nie.

Jy het slegs gedeeltelik gesien hoe die Heilige Gees deur profete werk. Dit is noodsaaklik dat jy kan sien dat ons nie mekaar kan oordeel nie want ons weet nie werklik wat 'n ander persoon deurgemaak het nie. Ons is die somtotaal van ons ervarings en alleenlik Elohim weet daarvan. **Hy het al die bewyse** en ken die bedoelings van die hart. Hy openbaar waarheid deur die Heilige Gees volgens Sy wil, nie ons s'n nie. Hy is nie krities nie, maar openbaar waarheid wat ons sal bevry van hindernisse in ons lewens. **Dank Vader dat Hy nog steeds mense oordeel (eintlik die neem van gesonde besluite deur Hom, want Hy het al die inligting!) sodat ons sy genade kan ontvang.**

Hoe wonderlik is dit wat Hy – die ware Regter – aan ons getoon het!

Jer.9:24 *...Ek, YHWH is wat goedertierenheid, reg (oordeel) en geregtigheid op die aarde doen; want in dié dinge het Ek 'n behae, spreek YHWH.*

Profete en die Kerk

Die hoof rede waarom mense nie kan glo dat daar hedendaagse profete is nie, is omdat hulle dink dat 'n profeet 'bokant' enige iemand anders is. Roy het self so gedink, tot Vader aan hom die teendeel gewys het. Party mense sien voorgangers, pastore en predikante in dieselfde lig – m.a.w. bokant gewone mense. Dit is so verkeerd, omdat daardie mense dan op 'n voetstuk geplaas word wat baie gevaarlik kan wees, want as so 'n kamma 'verhewe' persoon 'n dwaallering verkondig, kan mense hom blindelings volg. Ons weet hoe dikwels dit al gebeur het! Vader het aangehou om vir Roy te vertel dat Esegïel maar net 'n gewone man was wat Hy gekies het. As die kerk kan begryp dat die amp van 'n profeet 'n funksie is wat deur Elohim met Sy wetlike gesag ingestel is, kan hulle die profeet met ope arms ontvang.

Al die ampte van die vyfvoudige bedienings is maar net verskillende funksies vir verskillende take, uitgevoer deur mense wat Yeshua self kies. Profete maak deel uit van die vyfvoudige bedienings. Ons kan nie sê dat dit een-vyfde is nie want dit lyk of daar meer predikers, leraars en evangeliste as profete en apostels is. Uit die verhaal van Moses en die sewentig sien ons dat die Gees van profesie (Yeshua) oor engeen kan kom. Daar moet begryp word dat dit die funksies van die **hele vyfvoudige bediening** verg om ons (die liggaam van Yeshua) in die eenheid van die geloof en die volle kennis van die Seun van YHWH te bring. Dit is nie ons idee nie. Kyk na die volgende skrifgedeeltes:

Efes. 4:11-13 *En Hy het gegee sommige as apostels, ander as profete, ander as evangeliste, ander as herders en leraars, om die heiliges toe te rus vir hulle dienswerk, tot opbouing van die liggaam van die Messias, totdat ons almal kom tot die eenheid van die geloof en van die kennis van die Seun van Elohim, tot 'n volkome (perfekte) man, tot die mate van die volle grootte van die Messias...*

Die vyfvoudige bedienings sal voortgaan **tot** 'die eenheid van die geloof' bereik is. Ons noem dit die verskyning van die **vleklose Bruid!**

In die wil van die Heilige Gees, kan die salwing tydelik op enige gelowige kom om enige van die vyf funksies te verrig wat hierbo genoem is. Maar die ampte van die vyfvoudige bedienings word permanent besit deur mense waarvan die spesifieke funksie (dié van apostel, profeet, ens.) deel van hulle is, ingegraveer deur Elohim in hulle hele wese. *Hulle is daarmee gebore.*

Die kerk het elke funksie van die vyfvoudige bedienings **nodig**, tog erken min Christene **almal** van hulle. Erkenning is baie belangrik. As iemand nie jou posisie en funksie in die liggaam van Yeshua verstaan en erken nie, sal daardie persoon nie jou beloning kan ontvang nie (die beloning van Yeshua deur jou).

1 Kor 12:29,30 *Almal is tog nie apostels nie, almal is tog nie profete nie, almal is tog nie leraars nie, almal is tog nie kragte nie? Het almal genadegawes van gesondmaking, spreek almal in tale, kan almal dit uittê?*

Beslis nie! Dit is waarom die woord 'sommige' gebruik word in die volgende skrifgedeelte.

Efes. 4:11 *En Hy het gegee sommige as apostels, ander as profete, ander as evangeliste, ander as herders en leraars...*

Een van die redes waarom Yeshua se Liggaam op aarde siek is, nie net liggaamlik nie, maar met allerhande leringe, **is omdat individue nie die liggaam van Yeshua onderskei het nie**. Elohim is 'n Wese van orde wat alles wettig laat gebeur.

Om Vader se Woord korrek te onderskei beteken nie om woorde uit sinne te haal nie. Gebod op gebod en reël op reël beteken ook nie om woorde uit sinne of gedagtes te haal nie. Eerder is dit die byvoeging van **gedagtes** oor 'n sekere onderwerp ten einde Elohim se **volkome gedagte** oor daardie onderwerp te verstaan. **Die woord 'Woord' beteken Elohim se Woord, wat Vader se gedagte agter die woorde insluit.** Wanneer ons weer na die volgende skrifgedeeltes kyk, wat is Elohim se gedagte?

Efes. 4:11-13. *En Hy het gegee sommige as apostels, ander as profete, ander as evangeliste, ander as herders en leraars, om die heiliges toe te rus (vervolmaking) vir hulle dienswerk, tot opbouing van die liggaam van die Messias, totdat ons almal kom tot die eenheid van die geloof en van die kennis van die Seun van Elohim, tot 'n volkome (perfekte) man, tot die mate van die volle grootte van die Messias...*

Die skrif sê dat een van Elohim se gedagtes is dat ons **apostels, profete, evangeliste, predikers, en leraars nodig het; vir die vervolmaking van die heiliges**, ens. As ons apostels en profete uit Yeshua se Liggaam verwyder, verwyder ons 'n deel van Elohim se gedagte! Is Hy verkeerd? As ons dink die Liggaam van Yeshua **het al ooit** tot die vervulling van genoemde skrifgedeeltes gevorder, **sal ons weer moet kyk**. As ons dink die Gemeentes wat tydens die apostels se lewens bestaan het, het daardie Skrif vervul, **sal ons die Bybel weer moet gaan lees**. En as ons dink Yeshua se Liggaam (gemeente) wat vandag in die wêreld is, het al gekom tot die **eenheid van die geloof en van die kennis van die Seun van Elohim, tot 'n volkome man, tot die mate van die volle grootte van Yeshua**, DAN SAL ONS WEER MOET DINK! Wanneer hierdie Skrifgedeelte (Efes. 4:11-13) in vervulling gaan, sal daar **'n Bruid wees – sonder vlek of rimpel!** Indien ons nie glo dat daar profete na die dood van die apostels is nie, dan glo ons nie wat in die boek Openbaring staan nie.

Dan glo ons wat mense ons vertel het en nie wat Elohim ons vertel het nie.

Ons het profete nodig om korreksie in die kerk te bring. Ons benodig oordeel deur Elohim se Woord, **suiwer waarheid en die resultaat ingesluit**. Jona het Vader se Woord oorgedra, die **resultaat ingesluit**.

Is ons bereid om ons tradisie en dit wat ons glo te oordeel? Die Bybel sê ons moet onself oordeel, dan word ons nie geoordeel nie. Dit dui daarop dat sou ons nie onself oordeel nie, gaan ons in elk geval geoordeel word. Soms sal Vader 'n profeet stuur om omtrent onself die waarheid wat ons nie ken nie te openbaar, vir ons eie beswil. **As gevolg van genade** hoef 'n mens nie te wag vir die Wit Troon oordeel om geoordeel te word vir dinge wat reeds hier reggestel kan word nie. Daar sal ook genade geskenk word, maar streng volgens Vader se standaarde en buite ons beheer.

Gedagtes om ons denke aan te spoor.

Wat dink ons sal gebeur wanneer Vader sê: **“Ek het 'n profeet na julle toe gestuur, maar julle het hom verwerp?”** Ons sal waarskynlik onself probeer verdedig met: “Ek het nie geglo in profete nie. Ek het nie geglo hy was 'n profeet nie en ek het nie geglo wat hy gesê het nie.” Elohim mag sê: **“Ek het aan julle 'n brief gestuur, MY Woord, waarin ek vertel hoe om 'n profeet van my te herken.”** En ons sal vinnig teenwerp: “U Woord sê dat ek nie nodig het dat iemand my leer nie, omdat die Heilige Gees in my is.” Dit is hooghartig. Genade sal daar wees vir ons as ons gerred is, maar ons sal steeds op ons tande kners, wanneer ons die waarheid snap wat die profeet aan ons probeer oordra het. Ons mag sê: “Dit affekteer slegs vir my,” maar dit is onwaar. Die onwaarheid wat ons lewe, affekteer **altyd** hulle rondom ons en kan veroorsaak dat hulle die hemel misloop. **Roy kan getuig van die waarheid hiervan, want Yeshua het langs hom gestaan en hom gewys.** Is ons leerbaar? Of is ons beskermend oor dit wat ons glo, ongeag die waarheid? Die saad van onwaarheid produseer altyd sy vrugte.

Die kerk het die funksie van die profete nodig om die Vleklose Bruid te laat manifesteer. Yeshua is die Een wat die ampte van die vyfvoudige bedienings instel, NIE die kerk nie. Elohim is die hoogste regter. Elohim is die openbaarmaker van die waarheid. Elohim is die Een wat werklik ons begeertes ken. Elohim is die Een wat ons geroep het. Elohim is die een wat die uitverkorenes uitkies. Elohim is die Een wat ons en almal wat ooit gebore is sal ontmoet. Elohim is die Een wat gespreek en elke verbond ingestel het. (Hy het nooit die mens gevra hoe om enige iets rakende sy verbonde te doen, of rakende die funksie van Sy gemeente.) Elohim is die Een wat Sy Seun Yeshua gestuur het. Yeshua is die Redder. **Help ons Vader**. Stuur U profete. Oordeel het oor die kerk gekom. Oordeel kom oor die wêreld.

Dit is noodsaaklik!

Elohim sê:
“Sonder oordeel
kan daar nie genade wees nie!”

Die Boek van Herinnering
wat Elohim in Mal. 3 beloof het
is op die Take His Heart Bedienings Weberf.